

't Limburgs Vastelaovesleedjes Konkoer



Finale

vriedig 11 fibrewari 2000

Rodahal, Kerkrade



Rodahal
kerkrade

Maatwerk in evenementen



Installatie Bedrijf Roderland bv
Kerkrade

KvK ZL
634970 **bv Bruls en Co**
Architecten - Stedebouwkundigen - Ingenieurs
Maastricht

't Limburgs Vastelaovesleedjes Konkoer



Finale

Vriedig 11 fibrewari 2000

Rodahal Kerkrade

Prissentatie: Alf Poell

Orkes: Sir Duke o.l.v. Marcel Jungen

Samenstelling:

Jos Cremers, Geleen; Stichting LVK.

Druk en afwerking:

Van der Linden, Drukkerij en Stempelfabriek Geleen.



FINALE 2000

Oet gans Limburg hōbbe v'r de leedjes gekrieëge: 262 versjillende leedjes, vāōl versjillende dialekte van ós taal hōbbe v'r de lètste tied gehuuērd, twieë zaoterdige jurere, drie zōndige prizzentere op L 1, drie vriedige doezende formuliere tēlle, en noe eindelijk DE FINALE Ich wis 't waal, meh pès 't vurrig jaor houw ich dao neet zoeë bie sjtil gesjtange: 't Limburgs vastelaovesleedje laeft. Hōnderde luuj zint betrokke bie al die leedjes, oere van plezeer meh ouch zjweit zint oeteindelik oetgedrieët in dat geweldig leedje van luuj oet Gōttekaove, Haander, Se-Gieterre, Kessel, Wienesrao, Haors en neeum al die plaatsje mer op.

De hoofdjury haet gans sumpel gekónstateert dat de gemiddelde kwaliteit weer d'r op vuuroet gegange is, componiste en sjrievers hōbbe zich óngerein weer opgejent en gesjtimuleert óm alle creativiteit weer nao baove te haole. Dat is zuvere winst.

En dan dizze aovend de finale: 19 gelōkkige in ein springende drieēnde massa van vastelaovesvrung oet gans Limburg.

Vurrig jaor Belvend en noe Kirchrōa, de klanksjtad van Nederland, en dat is neet nieks (nuus zēgke ze hie, meh nuus is ouch nieks). Vanoet 'n tennisal noe nao de Rodahal: zoeë zuus-te, vastelaovend kint en mótt uēveral gevierd waere.

Ich dank jieēderein dae 'n biedrage gelieēverd haet: de luuj van Kirchrōa, 't besjtuur, L 1, de sjponsors, de hoofdjury en zieēker allenej die insjikde. Ze hōbbe allenej gewōnne.

Sjraar Cox
vuurzitter LVK



Alaaf,

't Is vuur d'r Kirchröatsjer Vasteloavends Verain "Alaaf Kirchroa 1936" ing jroeëse ier d'r finale van 't 24 ste Limburgs Vasteloavends Leedjes Konkoer i Kirchroa tse veransjaltte.

Zoeëwie d'r naam van d'r verain al aajieft woeëd deë jejrund i 1936 en vanaaf 't ieëtsjte joar hat d'r vasteloavends-sjlajer, zoeë neume vier e leedje, ing wiechtigege rol jesjild in 't fes va vasteloavend.

Vöal van de Kirchröadsjer sjlajere zunt óch wiet boese ós sjtadsjrenze bekankd. Dink mar aa "Kirchröadsjer meëdsjer", "Ja die mokkel", " 't Sjunste óp de welt", "Went d'r papa en de mama vasteloavend viert", "Sjweiermam jebakke", en jank zoeë mar wier. Lü wie d'r Mathieu Loop, Hans Keulen en d'r ummer nog aktieve Nico Ploum zunt inne bejrijf woeëde. Jiddes joar is in de Rodahal, woa óch óp 11 fibberwaar de finale jehoadte weëd, ós eje sjlajerparade woabij in jury en de lü in d'r zaal óp ing "songfestival achtige " maneer d'r nuie sjlajer weële.

I 1977 woar 't d'r Kirchröatsjer Vasteloavends Verain, deë als inne van de ieëtsjte jet jong óngerneëme um d'r ónappetietliege, wied jezoeëde en platte Hollendsje " Carnavalskraker" in de kweer tse komme durch zelve ing LP mit mieë wie tswantsieg Kirchröadsjer sjlajere oes tse bringe. En dat koam aa; i drei wèche tsiet woar die jód vuur jood, dat betseechent 10.000 plate verkoad. Bis d'r daag va hü zunt dat d'r 20.000, ieëtsj LP en noen CD. 't Is doarum óch nit jek ziech aaf tse vroege woarum de finale van 't Leedjes Konkoer nit ieëder i Kirchroa is jehoadte.

Als preziedent van d'r Kirchröatsjer Vasteloavends Verain wunsj iech alle mitwirkende an dizze finale tsouw dat ze krieje wat ze verdene. Ee lidsje kan mar jewinne, mar inne pries hat jidderinne finalist al jewonne, 't darve mitdoeë an dizze finale.

D'r Kirchröadsjer Vasteloavends Verain is alles dra jeleëje dat de mitwirkende, jury-mitjelieder en in 't bezónger de lü die zunt komme kiekke inne bombe en ónverjèsliège oavend zalle beleëve.

*Uur zut i-jelade, vöal sjpas en plezeer!
Kirchroa en Limburg ALAAF*

Bert van de Weijer
preziedent KVV





Wilkom i Kirchroa

*Jeer wil iech, voldoeë an de vroag um 't pro-
rambuchs-je van 't "Limburgs Vasteloavends-
leedjes Konkoers" tse eröfene .*

*Dat sjtelt miech in de jeleëjheet de orjaniza-
tore - de priesrichter, finaliste, supportere en
anger anwezende va hatse tse bejrusse in
de Rodahal die noen als narretempel is umje-
bouwd. 't Is vuur de ieësjte maal dat 't 24e
"Limburgs Vasteloavends Leedjeskonkoers"
in de Parkstad Limburg jehaode weëd. De vaste-
loavendssjtad Kirchroa is die ier tsem deel
jevälle en doa zint vier bezóngesj sjtoots óp.*

*'t Zunt tswai zaache die d'r richtieje
Kirchröadsjer mit de moddermilch kriet i-jejoave :
moezziek maache en vasteloavend viere. 't Zunt laider lü die mene dat ze 't
besser kanne mat 't zal vuur jidderinne duudlieg zieë
dat jinne an de Kirchröadsjer Vasteloavend tieppe kan.
Ing besser waal wie Kirchroa hat de orjaniezat-
siejoeën dan óch nit kanne treffe.*



Foto: Fotografie Jo Pöttgens

Rekord

*Vuur 't "Limburgs Vasteloavends Leedjes Konkoers 2000" kenne vier
ing rekordtsaal va 262 i-jesjikke vasteloavendssjlajere. Dat hat
't nog noeëts jejoave en is jet bezóngesj.*

*Ing jouw zaach vuur 't vödere en in iere haode van de Limburgse
Volkskoeltoer bis in alle ekke van ós provins en van alle zieë
woaes d'r wink sjteet. Ópvallend is de jroeëse tsaal van i-jesjikke nom-
mere oes de regio Parkstad Limburg en dat woare mar leefst 56 lidsjer.
De regio Noord-Limburg lieëveret wie jewend de mieëtste mit 90 lidsjer
en direk derno a koam Midden Limburg mit 62 sjtuk. De Westlieje mijn-
streek lieëveret, zoeëwie de regioa Maastricht/ Mergelland, 27 sjtuk.*

De hoopsriesrichter

*35 priesrichter zunt al in d'r detseember aajevange mit 't be-oerdele
en 't oeszukke van 262 i-jesjikke lidsjer. Oes al die nommere hant ze ing
oeswaal jetróffe va 51 sjtuk die in d'r Jannenaar in drei rungde va 17 óp
d'r radio L1 tse hure woare. Het "Vollek vaan Limburg" zal dan tsem
sjloes oesmaache waffer lidsjer i Kirchroa in de finale zalle kómme.*



Fes

't Limburgs Vasteloavends Leedjes Konkoers" is e fes vuur jans Limburg en kent ing richtieje Limburgse sjtiemmoeng. E oes-jelosse vasteloavendsfes vuur jans vasteloavend-vierend Limburg. Ing jroeëse tsaal karnevaliste zalle in de Rodahal prezent zieë. Als richtieje Vasteloavendsvruk vräu iech miech óp dat bezónger fes en dat sjun sjtuk volkskoeltoer dat vuur de ieësjte moal i 1976 woeëts jewonne durch d'r Venlose nommer "Woa goan-vaer haer". Mie antwoad doa óp. is noa Kirchroa: 't "Sjunste óp de welt" den doa "Wiegkelt en waggelt en sjokkelt 't jebun "óp Vrieddieg d'r 11e Fibberwaar.

Sukes

Tsem sjloes wunsj iech jidderinne deë mithelt vöal sukses, de supporters, aahank en alle anger lü die kómme kiekke en loestere, vöal sjpas doabij en ing sjun tsiet i Kirchroa. Iech hof dat dis 24e "Limburgs Vasteloavends Leedjes Konkoers" jenuw zoeë wie in de joare heivuur, zal oeswase als e jroeës koeltoerel Limburgs volksfes. Alaaf !

Drs. M.A.M. Wöltgens,
Burgemeester van Kerkrade.



Dao gaon we wir . . . !!

Tekst : Leo de Ronde

Artiesten : Leo de Ronde, Cher Burhenne
Paul van Dijk, Peter Meijboom

Meziek : Leo de Ronde & Cher Burhenne Plaats : Tegelen

Refrein

*Dao gaon we wir! Dao geit 't haer!!
Weej knâlle gaer d'r taengen-aan
Vûr 'nnen daag of veer!!
Zoë gaon we dèn jao as 't effe kên;
Vûr de joeks, vûr de lol, vûr de jèn !!*

*Met gôj-je zin d'r tössen-in, wat kênt 't gaeve;
Met die daag heb ich de daag van mien laeve....!*

*Dao gaon we wir! Dao gaon we dèn:
...vûr de joeks,....vûr de lol,....vûr de jèn!!!*

Couplet

*t Ganse jaor en det is waor, môsse hël werke.
Wie 'nne gare vuël sjpare in dien vêrke!
Det in november met 'nne zjwaoren hamer,
eine mêp kriég; op zien baove-kamer!*

*Ring-ke-de-king-ke, sjanp 't sjnel beej-ein:
En den make weej ôs oét de bein.....!*

Couplet

*D'n hêrfs vûrbeej, den kênne weej ôs vûrberei-je.
Bedingke wie weej ôs deze kiër verklei-je!?!
Den meug-se rao-je; weej zien neet te herkênne.
Jao den haesse veer daag um te wênne!*

*Hol-la-dié-jee-ja, och wat ein plezeër.....!
We beginne:..hup, dao geit-te haer.....!*



Noaijt gedach !

Tekst : Har Dullens
Meziek : Har Dullens

Artiesten : Onneuëzel tót de mach 3
Plaats : Susteren

Refrein

*Noaijt gedach, noaijt verwach tóch gekrege
Neet te gluive, 't aller leefste maedje droet
Noaijt gedach, noaijt verwach tóch gekrege
Zoa noe en den kómme de sjoanste druime oet
Ich zoe groat in de sjterre wille sjriev
Dich bös 't zunke waat de wolke duit verdriev
Noaijt gedach, noaijt verwach tóch gekrege
Ich bön zoa greuëtsj, onger ós gezach en gezjwege*

Couplet

*Ich dach maér ummer, al sjtaon ich oppe kop
Ich dach maér ummer, dae vleegeer geit neet op
Dich bös veur mich neet in de weeg gelag
Maér waat gebeurde haw ich noaijt verwach*

Refrein

Couplet

*Ich dach maér ummer, al zoe de weld vergaon
Ich dach maér ummer, dich zuus mich toch neet sjtaon
Maér este krigs waatste noaijt haws gedach
Is vâöl sjoander is des 't haws verwach*

Refrein



Dao geit d'r

Tekst : Ton Custers
Meziek : Ton Custers

Artiesten : Bienao te laat
Plaats : Maasniel

Refrein

*dao geit de te-te-te-te-telefoon
en ich zegk hallou mit mich
dao geit de te-te-te-te-telefoon
en wie geit 't nog mit dich
heur ich dae te-te-te-te-telefoon
den weit ich, 't is veur mich
mer ich h**ö**b noe effe geine tied
want de ganse zaal dae is de kop al kwiet
en ich dach des toe toch ouch waal wis
det 't weer vastelaovend is*

Couplet

*'t Prinsebal in volle gang hae sjteit al oere klaor
wachte velt es eder jaor de nuje Prins weer zijwaor
't is zowied de tied is dao de vors dae telt toet veer
mer net veurdet hae op mot gaon dao geit det dingk tekeer*

*nog effe toet asgoonsdig ederein is weer bie-ein
't inj van vastelaovend krieg de grootste sjpraekbuus klein
't koper bleus de longe laeg de ganse zaal dae zingk
de Prins dae haet 't effe kwaod den rammelt weer det dingk*



Mien sjuutje

Tekst : Herman Geenen
Meziek : Hub Lemmens

Artiesten: Trio Biejeingeraap
Plaats : Geleen-Lindenheuvel

Refrein

*Es ich dat sjuutje zeen van dich
dan bruk 't zunke door bieje mich.
Dien blosse wengskes in de bleuj
dieje make dat ich maeters greuj.*

*Es ich dat sjuutje zeen van dich
dan bruk 't zunke door bieje mich.
Ich veul mien hertje zoa gevleid
doe bès mien zieël en zaligheid.*

Couplet

*Vurrij jaor mit vastelaovend
't waor op 't prinsebal.
Keekste mich aan vöölbeloovend
jao doe wòs ich 't al.
Zaog dae leve lach van dich
en dach medein dae prins bèn ich.*

Refrein

Couplet

*Doe höb ich dich zònger vraoge
d'n ieësjte kieër heim gebrach.
Wieje v'r de sjterkes dao zaoge
'n handje òm dich gelag.
Keek nao dich en dich nao mich,
doe sjprook dat sjuutje drek veur zich.*

Refrein



Kôm euver de brök

Tekst : Paul Lenders & Ruud Bettinger Artiesten : Bernie Billekens & Leon Theuws
Meziek : Paul Lenders & Ruud Bettinger Plaats : Blerick

Refrein

*Kôm euver de brök, leef luuj
Laot ôg neet kinne
Kôm euver de brök, leef luuj
Laot ôg ens gaon
Ut is messchien waal effe winne
Maar straks dan ziet geej neet mier weg te slaon
Nae, zônder brök kint geej niks beginne
Want dan zult geej noëits heej staon*

Couplet

*Ja, ut is ein klaor gegaeve
Wat waor is det is waor
Weej môtte d'r mei laeve
De Majjum struimp maar door
Daorum is heej die brök
Die löp van kant nao kant
Veur ôs is det ein groët gelök
Die guïf ôs juus daen band*

Couplet

*Eine goojen buur is baeter
Dan eine wieje vrind
Die brök is hōnderd maeter
Det is toch ech gen ind
Dus pak ôg noow ens op
En kôm nao deze kant
Die brök die leet dao neet veur nop
Die guïf ôs juus daen band*



Tam - Tam !!

Tekst : Guus Steinen
Meziek : Guus Steinen

Artiesten : Kartoesj
Plaats : Groot-Sittard (Sittard-Limbricht-
Guttecoven)

Couplet

*Ich zoat in 'n kaffeeke, 't waas d'r röstig, 't waas d'r sjtil
Ich zoat doa mesjiens waal al twee drie oere
Toen gans inëns gebeurde 't: de deur vloog oet de stiel.
Van waat toen bènne koam doavan rammelde de moere
Doa koam 'n kepel noa bènne,
met vööl beheij wie die dat kènne
nou dao waas meteïn get oet
tam-tam in de boet!!
de sjuuf die sjuof waal 'ns d'r naeve,
mer woa 'n trööt is, doa is laeve
woa tam-tam is in 'n zaak,
doa wurd auch sjpas gemaak*

Refrein

*Hie wurd tam-tam gemaak
Hie waere neut gekraak
Hie goan panne van 't daak,
Hie is tam - tam !!!!
Hie wurd 't vel geraak !
Mit alles wat mer laeve maak
joa doa kènne veer wat van
Hie is ummer tam-tam*

Couplet

*zoagaw es veer die trömme heure,
en de sjuuf weer heure sjööre
weit' ver weer 't is zoa laat,
't is tied veur tam-tam
d'n tuba sjpiejt zich op de kleppe
de dikke trom die sjteit te meppe
want doa woa me zunk en lach
doa wurd tam - tam gemaak
Heur ze bööme heur ze sjööre
heur ze trööte, heur ze knööre
ederein geneet d'rvan,
ja dit is ech tam-tam !!
De noate vleege oet de trööte,
zoa 'ne tam-tam maak die meute,
nemes dae hie heivesj geit,
zoalang dit sirkes drejt*

Refr. Hie wurd tam tam gemaak.....

Refr: Lalalalalala



Luuj wie ôch

Tekst : Rob Allard
Meziek : Marcel Driessen

Artiesten : Rob Allard & André Kuijpers
Plaats : Velden

Couplet

*Vur jaore truûk nao aaflaup vån d'n optoch
Ging ik efkes en pilske drinke
Zoë opens stônd dao eine man
Ik kôs dae nôrges vån
Hae pakde mich hiél stevig vas
Ik vroog "wae bis dich dan"
Wet geej wat dae zei*

Refrein

*Zeg Hallo heej bin ik weer
Jao, ik bin heej toch zoë gaer
Met alle minse, hiél doén beejein
Âs gooje vrinde ônderein
Kôm doot nouw ein plezeer
Drink met mich en gleske beer
Want wât is leuker um te doon
Âs beej luuj wie ôch te staon*

Couplet

*'t Vurrij jaor nao aaflaup van d'n optoch
Kwaom ik zoëmaar dae man weer taege
En ik drökde zien gezich
Is taege det vån mich
Hae keek mich hiél verwônderd aan
En vroog "zeg wae bis dich"
We geej wât ik zei*



Ein vastelaovessjprookje

Tekst : Jac Engelen & Jan Velmans Artiesten : De Haelder Hofzengers
Meziek : Lei Ramakers Plaats : Heel

Refrein

*Vastelaovendj is net ein sjprookjesbos,
èllef kabouters en de prins zeen los,
Ederein in alle sjtaote,
es diej den waere losgelaote
Vastelaovendj den waerdj vanal bedacht
't liektj waal doezjendj en ein nacht,
Same handj, in handj,
door 't vasteleoveslandj.
Same handj, in handj,
door 't vastelaoveslandj.*

Couplet

*Sjnieëwitje det haaj 't kwaod,
wis mèt det prinske geine raod
En Roeëdkapje diej kleine vaeg,
Waas mèt dae wolf weer óngerwaeg.*

Couplet

*Pinokkio dae houte klaas,
dae keek neet verder den ziên naas,
En Alladin geitj hieël gaer droêt,
mer ging al gouw 't lempke oêt*



Vastelaovesblood

Tekst : José Stürbl-Hoezen

Artiesten : José Stürbl-Hoezen
& Zangkoor de Kuumers

Meziek : José Stürbl-Hoezen

Plaats : Belfeld

Refrein

*Ich heb vastelaovesblood,
Wat ein gelök, det duit mich good.
't Geit van de kop toet de tiëne,
det ken nèmes van mich liëne.
't Kriebelt zoë lekker det is genne sjien,
get sjoëners ken d'r toch neet zien.
Det zit jeej van binne waal good,
Ich heb vastelaovesblood.*

Couplet

*Wat is det toch, die kriebels in mien maag.
Ut held neet op, 't deurt de ganse daag.
Geej weit neet, wat det van binne is.
Is 't d'r neet, is 't un gemis.
Gelökkig 't is weer zoë wiët.
ch raak det noets mier kwiët.*

Couplet

*Als ich neet had, wat ich heb, is d'r noëd.
Puur riëkdom is neet blauw, maar zuuver roëd.
Zal dit 't zien in mien laeve.
Ut is mich als kink zien gegaeve.
Vuul lol en joeks heb ich genóg.
Gen wölske aan de lôch.*



Pincode Sjlaier

Tekst : Ummer d'r Neaver
Meziek : Ummer d'r Neaver

Artiesten: Ummer d'r Neaver
Plaats : Kerkrade

Couplet

*Is hei inne in de tent
Dee mieng pincode kent?
1234*

*Iech stong letst bij de flappe tap
Iech woos de code nit
Inne reuber deë zaat hinger miech
"Jef miech dat jeld mar mit"
Iech zaan "al heuts doe miech kapot
Iech bin d'r nommer kwiet
Jef miech dienne GSM, has doe nog effe tsiet?
Iech bel ut meëdje van de bank dat wit d'r nommer waal"
Als service van de zaak da ruft dat durch d'r zaal*

Refrein

*Alle-da, da pin-da, ja wat da?
Deuj mar 1234 dat is mienne pin
Alle-da, da pin-da, ja wat da?
Deuj mar 1234 hauw d'r pin mar d'r in*

Couplet

*D'r boef vong aa tse kriesje
Wie inne wasserval
"Deë apparaat deë maat miech jek
Kries doe dem aan d'r kaal?
Me mos de code wisse andersj wirkt d'r knoemel nit"
Iech zaan "noe jef mar hei dat dink en jank mar mit miech mit
Vuur junt werm noa dat meëdje dat wit d'r nommer waal
Als service van de zaak da ruft dat durch d'r zaal"*

Refrein



Ich en mien viltje

Tekst : Mo Vaessen
Meziek : Pieter Zeelen

Artiesten: Marc Hermans & Erwin Bonné
Plaats : St. Odiliëenberg

Refrein

*Vinj ich ein viltje rondj
Ônger mien donkerblondj
Vilt mich vanalles in
Sjrief ich ein nuuj begin
Op ein viltje rondj
Ônger mien donkerblondj
Op diene boek of rök
Sjteit 't allersjoonste sjtuk*

Couplet

*Mien glaas det vilt of sjteit mit dich
Altied ligks doe paraat
Mit ônger dich mien sjoon gedich
Want anders waert 't naat
De leefste wäörd aan miene sjat
Veur eeuwig en altied
In 't Limburgs plat op rijm gezat
Die rake nooit meer kwiet*

Couplet

*Ich dans en sjans de ganse nach
'T narrefees is los
Toch hilsse al dae tied de wach
Toet ich bön oetgehos
En heur ich dan de létste trom
'T is tied v'r motte gaon
Nog eine keer drej ich mich om
Dien glaas leut nog ein traon*

Couplet

*Nao drie daag is dae sjone tied
Toet volgend jaor gedaon
Mien instrument det bön ich kwiet
De sjtum gans nao de maon
'T pekske hang ich in de kas
'T ruuk nog get nao beer
Ich veul nog efkes in dae jas
En zeen die wäörd dan weer*



De brök

Tekst : Ben Verdellen
Meziek : Ben Verdellen

Artiesten : Leo Faessen
Plaats : Blerick

Refrein

*Is ôg det auk bekind, de maas haet twieë kante
Links dao woëne weej en rechts die beej de hante
Steiste aan de gooie kant dan hebste groët gelök
Of biste aan ut twiefele, aan twiefele, aan twiefele
of biste aan ut twiefele, dan
"kôm ens euver de brök"*

Couplet

*Gen brök die is veur ôs te vaer
um nao Bliërick toe te kômme
Daen optoch wille weej zeen
al die kleure en die blônne
Dao laef de gooie geis
aste tösse die minse steis
Dan dinke weej God zij dank
weej staon aan de gooie kant*

Refrein

*Weej gaon dök nao d'n euver-kant
met de träöte en met trômme
Al jaore op en aaf
en zoël ut dao ens van kômme
Wat meinste dao woord gefiës
Ôg kôs det dan 'ns oeïts bestaan
Det linker en rechter-kant
jao same de brök op gaon*

Refrein



Achter de tuba aan

Tekst : Koos Snijders
Meziek : Jo Deusings

Artiesten : Dik Betaald BéeVée
Plaats : Geleen

Couplet

*Sjtap veur Sjtap kump 'r dichterbiej
Achteraan in de hermenie
Lèt good op! Sjpring noe opziej!
Oete waeg! De tuba kump d'r aan!
Treuze! neet, gaef mich dien handj
Maak noe geine trammelantj
Sjnap mich vas, ich sjtaon in brandj
Oete waeg! De tuba kump d'r aan*

Refrein

*Veer tuffe allemaol achter de tuba aan
De tuba aan, achter de tuba aan
Veer tuffe allemaol achter de tuba aan
Sjuuf noe aan, sjuuf noe aan, blief neet sjtaon
Want veer tuffe allemaol achter de tuba aan
De tuba aan, achter de tuba aan
Veer tuffe allemaol achter de tuba aan
Sjuuf noe aan, griep dien kans, laot tich gaon*

Couplet

*Vief kilomaeter achterein
De groate meute kort opein
Langs mekaar en sjöddele doorein
Oete waeg! De tuba kump d'r aan
Ein-twee-drie jao angesjóm
Al wat rech is wurt noe króm
Wat zeen ich dao? Hae lup gans boete-óm
Oete waeg! De tuba kump d'r aan*

Refrein (2 x)



Det hádde we mótte weite

Tekst : Hannelore Winter
Meziek : Jan Bax

Artiesten: Thei & Marij
Plaats : Venlo

Couplet

*Wuurt de weiteschap
nów ózze nièje stichter
zien we blièj met die klónerie
Jan met de Pet en Hae en Het
staon al op 't stumbiljet
aape die ós nao met eur gezichten
lièke die op ós wie weej
och dan kwaam ik neet mièr beej*

Refrein

*Jao jao det hádde we van te veure mótte weite
det de ièuwigheid ós te wachte steit
weej laeve nog zoëlang van hup dao geite
wetse det de wind zich haet gedreijd
ós generatie wuurt ein sensatie
met al die klóne van dich en mich
det hádde we van te veure mótte weite
dm leepse nów met mien gezich*

Couplet

*Laot de weiteschap maar doedele waat dach-ge
as we döbbel gedöbbeld zien
laupe we dan van heej wies dao
eigelik ószelf maar nao
ligge we auk döbbel van 't lache
had de ganse Raod van Elf
eine veurraad van zichzelf*



De fraaje mit de medaaje

Tekst : Thei Wessels
Meziek : Thei Wessels

Artiesten : Leon Beurgens & Thei Wessels
Plaats : Sittard

Couplet

*Gans 't jaor dan wirk ich mich de blaore
Dan krig deze vent geine roe sent
Mer dae tied dae gong nog nootsj verlaore
Ich bèn mit ein vaer allang kòntent*

Refrein

*Noe kòm èns kieke nao mien medaaje
Woo deze fraaje veur is te paaje
Kiek mich èns prieke en kòm èns graaje
Nao die medaaje op miene boek
Went in de vastelaovestied
Dan kòmme ze van wied en zied
De sjoonste maedjes of 'n kernaaje
En ouch nog van die haaje-baaje
Die kòmme kieke nao mien medaaje
Nao die medaaje op miene boek*

Couplet

*Ich bèn mit mien twintigste medaaje
Waal ein finnemeen en dat is te zeen
Veurig jaor doe waar ich eine saaje
Went doe hauw ich d'r mer neugeteen*

Couplet

*Wilt geer uch dao ouch èns mit bemuije
Höb geer uch gesjpich wiel me toch gein krig
Sjponsor dan geweun èns doezend guije
Volgend jaor dan zingk geer sjus wie ich:*



Ich höb ein sjuufke los

Tekst : Michel Nita
Meziek : Joep Servais

Artiesten : Leste Aom
Plaats : Roermond

Refrein

*Ich höb ein sjuufke los, waat mot ich noe beginne ?
Ich höb ein sjuufke los, dao kin ich nieks aan door
3 daag bön ich de klos, ich geluif 't zit van binne ...
en eederein dae zaet dae kaerel is neet good !!
Ich höb ein sjuufke los, wie zol det noe toch kinne??
't is neet te geluive wiej ich mich van binne veul
Ich kin mich zellef neet meer terök, 't is 'n wonjer ...
Ich höb ein sjuufke los en det maak mich zo bliej !!*

Couplet

*'t rammelt al ein tiedje, maar noe bön ich ech de klos!
't sjuufke det weer vas zoot, jao det zit beheurlik los !
ich lach mit alles en ich dans de ganse daag op sjtraot ...
en kump ein hermenieke langs, sjpring ich weer oet de maot....
waem haolt de sjroevedreijer oet de kas ?
en dreijt mien sjuufke vas ??*

Couplet

*'t is eeder jaor 't zelfde mit dees daag van heel vaöl lol,
det sjuufke det sjuut dan weer los, en dreijt zich dan weer dol ...
maar es ich om mich haer kiek is det helemaol neet gek!
d'r zeen zat anger gekke mit detzelfde gebrek!
waem haolt de sjroevedreijer oet de kas ?
en dreijt mien sjuufke vas ??*



Veur gein miljwan

Tekst : Gaston Jacobs

Artiesten : Gaston en vrung

Meziek : Gaston Jacobs

Plaats : Ulestraten

Refrein

*Veur gein miljwan zou ich dit wille misse
Veur gein miljwan wil ich dit kwiet
Ozze Limburgse vastelaovend dê maak os allemaol zwa riek
Noe kiek nao al die lachende gezichte, noe zuug wie blie gelôkkig
en kontent
Jao van z'n leve wil ich dit neet misse, want eederein is in z'n element
Jao van z'n leve wil ich dit neet misse, al kosde 't mich de allerlêtste cent*

Couplet

*Whê hêet dit oetgevonge, whe hêet zich dit bedach
Dat zinge en dat sjpringe, 't is alles wat hie lach
En eederein versjteit zich, want eederein kalt plat
Kom pak uch bie de sjouwers, dan hubbe v'r dat gehad*

Couplet

*Dit is neet te betale, dit geve v'r neet aaf
Dit doon v'r neet verkoupe, dit vinge veer te gaaf
Kom laot os profiterere, wat rammelt os de prie
Zwa same achterein goon, dat maak een ganse rie*



Josefien

Tekst : Wim Roeffen & Frans Boermans Artiesten : Wiel Vestjens & Gé Deenen
Meziek : Wim Roeffen Plaats : Venlo

Couplet *Josefien zag taege mich
Jông ik bin op tiëd beej dich
Maar nae, ik zeen um neet.
Josefien duit det waal miër
Dit is neet d'n iërste kiër
't-Is weer 't zelfde leed.
 Det kump dan heej op neer,
 De vraog is altiëd weer:*

Refrein *Kumpste waal, kumste neet
Kwaam ik det maar aan de weet
Aoh Josefien.
Want de hads mich gezag
In de gats um hallef ach
Aoh Josefien.
Zônder dich det rök ik neet
Det wil ik neet, det lök mich neet.
Zônder dich wil ik neet zien
Aoh Josefien.*

Couplet *Josefien det veult zich sterk
Want det haet allang gemerk
Det ik neet zoëmaar gaon.
Want ik weit wie 't kin zien
As ik bin beej Josefien
Dao blief ik gaer veur staon.
 Det kump dan heej op neer,
 De vraog is altiëd weer:*

Couplet *Maar now woel ik waal ens zeen
As auk "ik" ens neet verscheen
En "het" stônd dao te staon
Nae dan woort d'r neet gewach
Genne mins dae dao aan dach.
Het waas geliëk gegaon
 Det kump dan heej op neer,
 De vraog is altiëd weer:*



**WINNENDE SCHLAGER VAAN 1999:
"IECH HÖB DIECH WEER GEVOONDE"
NOG STEEDS EEN HIT! ONGELUIFELIK MER WOER,.....!**

Mestreech - 't Verhaal begint in feite in september 1998. Veer hadde 'n aontal leedsjes gesjreve veur 't Merretkoer die in januari 1999 mèt 'ne CD zouwe oetkoume. 't Zouw d'n ierste groete CD weure vaan 't Merretkoer. Iech höb diech weer gevonde!, kouw ooch op dee CD te stoon. In euverlègk mèt de hiere en dames vaan 't Merretkoer woort beslote um dit wèlkse, geproduceerd en gearranzeerd door Fred Mays vaan Pebble Music in te sjikke veur 't LVK vaan 1999. In december 1998



hoorte veer tot v'r geselecteerd waore veur de halve finale. Veur us neet de ierste kier mer veur 't Merretkoer 'n hiele beleving. Good de kums euver de radio, en 't hiele speul geit beginne. Veer waore allemaol hiel gruuts op 't leedsje en hoopte 'n finale plaots te behaole. Mer jeh, dat is gemekeliker gezag daan gedoon. Jaomer genog is de kwaliteit vaan 'n leedsje neet altied voldoende um geliek de finale te haole. Ongelukkig mer woer,...! Iech rappeleer miech zondag 31 januari 1999. Ursala en iech mooste mèt eus 2 döchterkes nao watervereniging Treech veur 'n optreije. Donnee en Solange hadde 'n week vaan te veure de publiekspries gewonne bei de Klets-kriemerkesmiddag vaan de Mosasaurusse, es Berb en Gradus. En daan hōbste verpliechtinge, neet woer! 't Merretkoer had 'n optreije in Zörgcentrum Campaigne.

Veer hadde aofgesproke toujours contact te hawwe mèt ,ne GSM. Miene Pa waor in d'n oto blieve zitte, heer wouw niks misse vaan d'n oetsljaag en zouw us wèl op de huugte hawwe! Ongelukkig mer woer, veer zaote neet bei de 6 finalisten vaan de lêste oetzending. Mer de wets mer noets. Dus Pa ging opnuij luustere en kouw toen mèt 't gooj nuijts tot veer toch nao de finale mogte. Ongelukkig mer woer! Geer begrèp wèl tot veer dat nog same mèt 't Merretkoer tot in de late eurkes gevierd hōbbe. De daag d'r nao 'ne kop wie 'ne ummer mer wèl mèt e good geveul. Daan alles regele um nao de finale te goon. De bus, kaartje, wie kin wèl en wee kin neet mèt. Peter vaan 't Merretkoer en 'Willie Brepoels, de pa vaan zanger Erwin hōbbe toen vōl wete te ranzjere, jammers d'n tied waors erg kort! Daan d'n daag vaan de finale; vriedag 5 fib-



berwarie. Um 4 oor verzamele oppe Merret en mèt 'ne groete en 'n klein bus nao Belfeld. Dao koume veer in ierste instantie terech in 'ne peerdestal of manege. Mer wat waor 't dao gezellig! D'n daag kos neet mie kepot. Weijer nog de kopleminte veur de organisatie want die waor gewoen hiel good! Vaan te veure wiste veer tot v'r e good leedsje hadde, 't einigste wèlske vaan de finale, mer aon de aandere kant waor de concurrentie hiel erg groet. Aon winne hadde veer ierlijk gezag neet gedach. Veer waore gruuts um mèt te kinne doen. 't Konkoer waor gewoen super gezellig, allemaok leuke en gooj en minder gooj leedsjes zoe es ziech dat heurt in 'n finale. Daan d'n oetslaag. Vaanaof 't begin laoge veer good in de 'merret' en dat gief de börger mood, neet woer! Nao de derde zjuring koume veer aon d'n top en wee had dat vaan te veure gedach, zeker es towgevoog nommer! Mer zoe kin 't ooch laope. Bei de lêste jurie heelde veer us hart vas want este bovenaon steis wèlste ooch winne. Venlo en Belfeld zaoten us op us hakke en d'r kos nog vaanalles gebäöre. Daan de verlossing; lech hōb dich weer gevoonde woort oetverkore tot winnaar. Veer waore hiel gruuts op 't Merretkoer, die 't leedsje op 'n fantastiese manier gebrach hadde! En netuurlijk op us zèllevers. Nao debekindmaking braok 'ne volledige chaos oet op de buhne. 't Waors gewoen neet mie te euverzeen! 'n Ederein waor door 't dōlle heen. Gewoen neet normaal, zoe es Erwin dat zouw zègke! Wat d'r nao allemaol nog gebäört is is in feite mèt gein pen te besjriev. Ongeluefelijk mer woer,....! In Mestreech hōbben veer die nach nog flink de blōmkes boet gezat, en d'n daag d'r nao waor 't e gekkenhoes. Um 8 oor gong al d'n telefoon en veurtot 't 12 oor waors, waor dee kloemel al 55x aofgegaange! Die week veur de Vastelaovend waor um noets te vergete! En 't sjoenste vaan alles waar:lech hōb diech weer gevoonde woort 'ne absolute topper mèt de Vastelaovend. 't Merretkoer heet ooch nao de Vastelaovend beweze 'n openbaring te zien veur de Limburgse meziek en score hit nao hit! En veer Ursala en Bert goon gewoen door mèt euze groetste hobbie en passie; leedsjes make en Vastelaovend viere! Veer hope oets nog 'ns 't LVK veur Mestreech te mage winne!! lech zouw zègke 't geit uuch allemaol hiel good, 'ne hiele sjoene finale-aovend en alvas 'ne zaolige Vastelaovend!

Bert en Ursala Garnier.
Mestreech

van de weijer & leussink

n o t a r i s s e n

heerlen



Slijp- en schuurmaterialen

Hoensbroek



Rabobank
Kerkrade





Rabobank



UW BAND MET DE REGIO.